



UNIVERSITÄTS-
BIBLIOTHEK
PADERBORN

Collegium Universi Juris Canonici

Engel, Ludwig
Salisburgi, 1693

8. De Autoritate & Usu Pallij.

[urn:nbn:de:hbz:466:1-61596](https://nbn-resolving.org/urn:nbn:de:hbz:466:1-61596)

TITULUS VIII.
De Authoritate & Usu
Pallij.

SUMMARI A.

1. Pallium quid?
2. Cur dicatur de Corpore D. Petri?
3. Quibus competat?
4. Quid denoret?
5. Archiepiscopus quae possit vel non sine pallio?
6. Pallio quando uti liceat?
7. Pallij usus ubi concedatur?
8. An etiam in loco exempto?
9. Archiepiscopus & Episcopus qualiter possint Pontificalia exercere in loco exempto, & quid, si exempti resistant?
10. Pallium cohaeret Personae, & loco.

Pallium est singulare ornamentum desumptum ex Corpore D. Petri, & à summo Pontifice Archiepiscopo datum, designans plenitudinem pastoralis & Archiepiscopalis officii, quo Archiepiscopus certis solum diebus, & intra Ecclesiam uti potest.

Dicitur I. Pallium esse de Corpore D. Petri, cap. significasti. 4. de Electione. vel quod consecratum deferatur ad altare D. Petri in memoriam Corporis ejus, & inde tradatur Archiepiscopis, aut Procuratoribus eorum, ut existimat Glossa & Barb. in d. cap. significasti. vel quod indicet veluti partem Ecclesiasticae potestatis, quae de Corpore D. Petri, hoc est, de universali regimine Ecclesiae Archiepiscopis conceditur, sicut putat Hostiensis, in cap. ad honorem. 4. h. tit. num. 3.

Dicitur II. Pallium dari Archiepiscopis: & imprimis quidem summo Pontifici competit, quia ipse Archiepiscopus Romanus, id est, Princeps & Episcopus Episcoporum omnium habetur; deinde Patriarchis & Archiepiscopis inferioribus; ali-

quando etiam ex speciali gratia & privilegio quibusdam Episcopis datur.

Hæc porrò concessio Pallii impediri non potest per criminis aut defectus objectionem, nisi objiciens intra bimestre tempus probationes paratas exhibeat. Extravag. un. h. tit. inter Com.

Dicitur III. per Pallium plenitudinem Pastoralis (qua de causa ex ovium lana conficitur) & Archiepiscopalis officii designari: etenim electus ad Archiepiscopatum, tamen confirmatus vel consecratus sit, Archiepiscopum tamen se nominare non potest ante acceptum Pallium, nec ea, quae Archiepiscopalis officii sunt, exercere, cap. 3. h. tit. * licet verò per consecrationem acceperit potestatem & characterem Ordinis Episcopalis, nihilominus hanc Ordinis potestatem, quae inter Missarum solemnias, vel in Pontificalibus ornamentis peragitur, ut conficere chrisma, consecrare Ecclesias, ordinare Clericos, ante acceptum pallium exercere non debet, cum id non tantum simplex Episcopus, sed ut Archiepiscopus facere videatur. cap. quod sicut. 28. vers. praeterea. de Electione. Actus verò jurisdictionis, ut audire causas, delegare, censurare, &c. exceptis illis, qui Archiepiscopo sunt proprii, ut visitare Provinciam, vel Concilium provinciale congregare, post obtentam confirmationem facere non prohibetur. Extra provinciam quoque suam, ab alieno Episcopo invitatus ibidem actus Ordinis exercere potest, quia cum extra provinciam Pallio uti nequeat, ut mox dicemus, censetur tales actus facere, ut quilibet alius simplex Episcopus. Ea etiam, quae sine missa, & in Stola tantum ab Episcopis fieri solent, ut sacra vasa, aut paramenta, vel camiteria benedicere, Baptizatos confirmare, &c. ante acceptum Pallium exerceri posse, praesertim

fertim consuetudine accedente, putat Hostiensis hoc loco sub num. 1. & quod generaliter Archiepiscopus actus Ordinis, quos ante acceptum pallium ipse facere nequit, alteri Episcopo delegare & committere valeat, cum delegatio sit actus jurisdictionis, non Ordinis, satis colligitur ex c. suffraganeis. 11. de Electione.

6 Dicitur IV. usum Pallii tantum certis diebus licitum esse: quamvis enim solus Papa inter Missarum solennia semper, & ubique utatur Pallio, cum ipse solus vocatus sit in plenitudinem pastoralis officii respectu universalis Ecclesiae, inferiores autem Episcopi, qui in partem tantum sollicitudinis, respectu particularium Ecclesiarum vocati sunt, statuti solum diebus juxta tenorem privilegiorum suorum, & consuetudines locorum in festis principalibus Ecclesiae universalis, vel suae particularis (quae in Calendario Ecclesiastico specialiter annotari solent) item & in Anniversario Consecrationis suae, ac in Ordinationibus Clericorum, Consecrationibus Ecclesiarum Pallio utuntur. c. 4. & ult. cum Gl. ibidem h. tit.

7 Dicitur V. gestationem Pallii tantum intra Ecclesiam suam Archiepiscopo permittam esse; nomine autem Ecclesiae tota ipsius provincia intelligitur. cap. 1. h. tit. Privilegio tamen Apostolico etiam acquiri potest, ut extra provinciam Pallio utendi, dummodo licentia Episcopi, cujus est diocesis aliena in ordine ad Pontificalia exercenda, & consensus Archiepiscopi, cujus est provincia in Ordine ad ulum Pallii accedat. Consuetudo verò utendi Pallio extra Provinciam invalida & corruptela declaratur. in cap. ex tuarum. 5. h. tit. nisi forte iusto titulo, aut fama saltem privilegii adjuvetur.

An autem si Archiepiscopus in loco exempto suae Provinciae divina officia in pontificalibus celebret, sicut ei permittitur in Clem. 2. de Privilegiis. licet utatur Pallio? quæri posset. R. cum Glossa ibidem affirmative, tum quod in dicta Clem. generaliter concedatur celebratio in Pontificalibus sine exceptione Pallii, tum quod locus exemptus (qui speciale Territorium non habet; & nullius diocesis non est) reputetur in diocesi & Provincia, quamvis non de diocesi, & provincia, ut infra Lib. V. Tit. XXXIII. de Privilegiis §. ult. explicabimus.

Hoc loco obiter adnotandum est, quod Archiepiscopus possit quidem propria Authoritate in loco exempto Missam solemniter celebrare, vel coram se ab alio, sine Pontificalibus tamen, facere celebrari, qui actus honoris censetur, non tamen possit sine licentia exemptorum ea, quae sunt officii, & jurisdictionis, ut ordinare, judicare &c. Item si exempti indebitè resistant Episcopo volenti celebrare in eorum Ecclesiis, non poterunt propterea ab eodem Episcopo puniri, sed à legitimo suo superiore. Fagnan. in cap. 1. h. tit. num. 18. & 19. ubi in fine dicit, sic omnes DD. tenere.

Coeterum Pallium ita cohaeret personae, 10 ut alteri cedi vel commodari nequeat, sed cum eo quisque sepeliendus sit, cap. 2. h. tit. Quod si contingat, aliquem de uno Archiepiscopatu ad alium transferri, novum Pallium impetrare debet retento etiam veteri, quo quidem amplius non utitur, cum sit specialiter proprio tantum Ecclesia datum, in sepultura tamen ipsi adjungitur. cap. bone. 4. in fin. & ibi Gl. in v. Pallium. de Postulat. Pralat. Innoc. & Pa. norm. in d. cap. 2. h. tit.

N 2

TITU.